



## Hoese glunggi 2009

Y hoff es git jetz do kai Drama  
Wägem neije Cheff Obama  
Dä macht jo alles nei und wählt sogar e Frau  
Ihre Tschopp isch dä vo dusse  
Muess verhandle mite Russe  
D Hillery macht das jo gärn dr Putin au  
Z Basel kennt doch kain die Qual  
Sisich halt nimm wie dazumal  
Nid nur dr Wahlkampf isch so still  
Me nimmt doch aifach dä wo will

Die groosse Player sängge d Bryyse  
Das mache die nur wäg dr Gryyse  
Was hänn die Lääde vorhäär an uns vier verdient  
Joorelang hänn die uns bschysse  
Alli Bryyse iiberrysse  
Jetz geen si aabe mit dr Marsche well si mien  
Jetz sait dr Lydl und dr Aldi  
By uns gits alles nur firs Halbi  
Wenn das bym Stuggi oobe saisch  
Griegsch dr Däller ohni Flaisch

By de Präsekonferänze  
Fillt doch Präss nur ihri Ränze  
Si wänn nur wisse wievyyl Breetli sin scho gschmiert  
Bym schryybe dien si nur drglyyche  
Was me sait dien si denn stryyche  
Das isch doch deene schnuppe was uns intressiert  
Baz-Läser sin doch jetz die Dumme  
Bschtell se ab und setz e Zaiche  
Wenn die schryybe moorn schyint d Sunne  
Kunnts denn 100 pro ko saiche

**IWB** haisst in Lozärn  
Wyterbildig hänn si gärn  
**IWB** stoot fir in dämm Fall Ich **Waiss Bs**chaid  
Z Basel isches halt e soo  
Me waiss alles sowisoo  
S **IWB** isch staadlig und das duet is laid  
**Industrielle Werke Basel**  
Soo haisst das by uns ganz grisse  
Und wenn dr Cheff sy Abschyd git  
Haissts ab denn - Ihr **Wärdet Bs**chisse

Dr Herzog und dr de-Meuron  
Baues Olympiastadion  
Aber d Chineeese zaahlen erscht wenns fertig isch  
Vorhäär rassle mit de Sääbel  
Denn seehsch nyt me wäg dem Nääbel  
Im Wasser schwimmen alli schnäller als e Fisch  
Dopingsinder sin voruss  
Dopingfander hindedry  
Wenn 4te bisch heschs denn am Beschte  
Well si nur die erschte Drey dien teschte

Die wunderscheeni Basilea  
Dr Fritschi sait won ych die gseeh ha  
Uffem Rotshusstäg verdrait si ihm sy Kopf  
Syt dämm omineese Raub  
Isch är uff den Ohre taub  
Är muess uff Basel aabe goo dä armi Dropf  
In dr Safere im Verliess  
Deert gootsem nämmlig zimmlig mies  
S scheenschte Stadion hett är gseeh  
Nadiirlig das vom FCBeeeeeeeee

D Baselbieter wänn nyt zaahle  
Derfir kemme si in dr Schaale  
Ins Theater und wänns by uns ko gniesse  
Nur uff Bsuech in unserer Stadt  
Und denn haue si wider ab  
Am Banndaag wänn si uns nid - si wänn nur schiesse  
S 9te Stadion hänn si welle  
Aber Bsuecher kaasch nid bstelle  
Und SVP duet numme liege  
E faahrende ka doch nid fliege

Dr Busch isch wägg sin alli froh  
Är hätt scho lengschtens miesse goo  
In Arabie wärfe si scho mite Schue  
Als texanische Cowboy  
Blybt är synere Linie treu  
Är schiesst alles zämme - git kai Fähler zue  
Als ussrankierte Presidänt  
Hätt är sicher no s Talänt  
Mir hoole dä do simmer stuur  
Als SVP Plakatfiguur

D Calmy Rey die Schleier-Eule  
Und dr Couschpäng mit dr Käule  
Unsre Bundesroot als Gruuselkabinett  
Dr Leuebärger hett kai Ranze  
Dr Merz duet nur no Note stanze  
D helfti vo deene 7 ligt im Lazarett  
D Leuthard luegt fir d Asylante  
D Widmer Schlumpf als Färseh-Tante  
Dr Muurer verraisst ussem Blocherverstegg  
Är gilt jetz als Pirateschregg

Mir finde das au Goppelooni  
Doch veruggt mit dääne Boni  
Nai es isch sogar e Rieseschweinerei  
Mir schaffen au und es goot ooni  
Hänn kai Disch uss Mahagoni  
Mir sin jetz sofort gäägi die Abzoggerei  
By uns froggt au kain ob sichs looni  
Im Büro z flirte mitem Vroni  
Y haa das gmacht aber verschon mi  
Dä Boni haisst hyt Luggatoni

Woos no ghaisse hett mir mien  
Ins Milidäär im Tenue grien  
Hänn mir is gschtreubt aber es hett alles nyt gnutzt  
Mitem Ruggsagg uffem Rugg  
Hyt seehsch se mit Plastigguge  
Au unseri Schue und Glaider hämmer sälber butzt  
Mir hänn no Angscht kaa vorem Oschte  
Hänn no miesse Vorroot boschte  
Hyt kennes die Junge kuum erwarte  
Goo z kämpfe gäge Rhyirate

---

Wotts ch au by uns bänggle ?  
Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

---